

SCRIPT OF MORNING GOJRI NEWS BULLETIN 2SEP 1015 HRS

ما رننگ گو جری نیو ز بلیٹن مو رخہ 2 ستمبر 2025

یوہ آکا شوانی جموں ہے باغ علی طاہر تیں خبر سُنو۔

SHAH JK FLOODS

مرکزی وزیر داخلہ امت شاہ غو کہنو ہے جے 2 عرب 9 کروڑ روپیاں غی رقم مرکزی سرکار غی طرفوں جموں کشمیر نانہہ ایس ڈی آر ایف غی کاطر مہیا کرائی گئی ہے جس غی وجہ نال بدل پٹھن اچانک سیلاب آجان تے زمینی تودا کھسکن غا نتیجہ مانہہ ہوا نقصان تیں بعد ریلیف غو کم شروع کیو گیو ہے اپنا جموں دورہ غے دوران وزیر داخلہ نے راج بھون مانہہ لگاتار 3 میٹنگاں غی صدارت کی پہلی میٹنگ غے دوران جموں صوبہ مانہہ لگاتار بارشاں تے سیلابی صورتحال سنگ ہوا نقصان غو تفصیلی جائیزو لیو گیو جد کہ دوجی میٹنگ یو تی گا بی جے پی غا صدر شتشرما غی قیادت مانہہ آیا بی جے پی غا ممبران پارلیمنٹ تے ممبران اسمبلی سنگ منعقد ہوئی تیجی میٹنگ سلامتی دستاں غا اعلیٰ عہدیداراں سنگ منعقد ہوئی جس مانہہ سلامتی صورتحال غو جائیزو لیو گیو۔

LG FLOODS

لیفٹیننٹ گورنر منوج سنہا جہڑا جموں گا سیلاب تیں متاثرہ علاقاں گو جائیزو لین غی خاطر وزیر داخلہ امت شاہ غے ہمراہ موجود تھا نے کہیو ہے جے اُن غو دل اس قدرتی آفت غی زد مانہہ آغے جان کھودین آلا افراد غا لواحقین سنگ بروبر دُکھ ظاہر کر رہیو ہے اُنہاں نے کہیو جے وزیر اعظم نریندر مودی تے وزیر داخلہ امت شاہ نے یقین دوايو ہے جے متاثرہ افراد نانہہ ہر ممکن فوری امداد مہیا کرائی جے گی اُنہاں نے کہیو جے غیر معمولی موسمی صورتحال غی وجہ نا ضلع سطح غا افسراں نانہہ چوکس رہن تے صورتحال ور 24 گھنٹا نظر رکھن غی لوڑ ہے اُنہاں نے لوکاں تیں وی حفاظت غی خاطر احتیاط برتن غی اپیل کی ہے۔

SATISH CHOWK VISIT

ٹرانسپورٹ محکمہ غا وزیر ستیش شرما نے کل چوکی چورا بلاک غی پنچائیت راہ غا راہ گراں تے پردو ملارا غا وارڈ نمبر دو تے وارڈ نمبر چار غو دورو لاغے پاری باریشاں تے اچانک سیلاباں سنگ ہوا نقصان گو جائیزو لیو اپنا دورہ غے دوران وزیر موصوف نے متاثرہ کُنباں غا افراد سنگ ملاقات کی تے جائیدادں ترقیاتی ٹانچہ تے زرعی کھیتاں نانہہ پُجیا نقصان غو جائیزو لیو اس موقع ور اُن نانہہ جانکاری دتی گئی ہے جے علاقہ تیں 10 کُنباں نانہہ محفوظ جگہاں ور منتقل کیو گیو ہے ان کُنباں گا افراد نانہہ گورنمنٹ ہائی سکول تے پنچایت کھر راہ سلیوٹ مانہہ رکھیو گیو ہے جناب شرما نے ضلع انتظامیہ تے متعلقہ عہدیداراں نانہہ ہدایت کی ہے جے متاثرہ افراد نانہہ فوری طور ور ریلیف تے باز آباد کاری غی امداد میسر کرائی جے۔

SAKEENA BGSBU

وزیر تعلیم سکینہ اتو نے کل بابا غلام شاہ بادشاہ یونیورسٹی راجوری غا تدرسی تے ا
 نتظامی کم کاج غو سیول سیکرٹریٹ سرینگر مانہ منعقدہ اک اعلیٰ سطحی میٹنگ
 غیدوران تفصیلی جائیزو لیو میٹنگ غے دوران اُنہاں نے یونیورسٹی غا تدرسی تے تحقیقی
 کم کاج تیں علاوہ یونیورسٹی غا ٹانچہ طالب علماں غی خاطر کی اجان آلا بہبودی اقدامات
 تے دوجا متعلقہ اقدام سمیت یونیورسٹی غا تمام معاملان گو تفصیلی جائیزو لیو۔ میٹنگ مانہ
 بولتاں واں وزیر تعلیم نے کہیو جے بی جی ایس بی یونیورسٹی ور پیر پنجال خطہ مانہ
 اک کلیدی تعلیمی ادارو ہونگی مناسبت سنگ یاہ خصوصی زمہ داری عائد وے جے واہ
 معیاری تعلیم بُر پیدہ کرن غی صلاحیت تے اخلاقیات غو درس دے غے نوجواناں غا
 مستقبل نانہ روشن بناوے۔

RANA DELEGATION

جل شکتی محکمہ غا وزیر جاوید احمد رانا سنگ کل نگر وٹہ تے سیدحڑا علاقان غا
 وفداں نے ملاقات کرغے حالیہ سیلاباں سنگ ہوا شدید نقصان سنگ اُننانہ واقف کرایو
 ان وفود نے وزیر موصوف تیں ضروری بنیادی ضرورتاں غی فوری بھالی تے متاثرہ
 گُناں نانہ فوری امداد مہیا کران غی اپیل کی۔ جناب رانا نے اس موقع ور وفداں سنگ
 گل کرنا واں اُن نانہ یقین دوايو جے عمر عبد اللہ غی قیادت آلی سرکار صورتحا ور
 نزدیکی تیں نظر رکھیا واں تے عوامی مفاد غا تمام اقدام ور فوری عمل کیان جان غی
 وعدہ بند ہے اُنہاں نے کہیو جے ضروری خدمات غی بحالی انتظامیہ غی ترجیحات
 مانہ شامل ہے۔

DODA FLOODS

ضلع ڈوڈہ حالیہ بارشاں غی وجہ نال آیا سیلاب غی زد مانہ آغے 5 افراد ہلاک ہو گیا ہیں
 سرکاری زریریاں نے دسیو ہے جے سیلابی صورتحال تے پاری بارشاں غی وجہ
 نال 89 مکان مکمل طور ور تباہ ہو گیا ہیں جد کہ 111 مکاناں نانہ شدید نقصان پُجیو ہے۔
 اس توں علاوہ 438 کھر کوٹھاں نانہ جُزوی نقصان پُجیو ہے ڈوڈہ غا ڈپٹی کمشنر ہرویندر
 سنگھ نے دسیو ہے جے اس قدرتی آفت غی زد مانہ آغے ہلاک ہوا افراد غا لواحقین نانہ
 ایس ڈی آرایف غا ضابطاں غے مطابق 5-5 لکھ روپیاں غی ایکس گریشیا امداد دتی جے
 غی ڈپٹی کمشنر نے لوکاں نانہ دریا واں تے دوجی آبی گزر گاہاں تیں دور رہن غی اپیل
 کی ہے اُن غو کہنو تھو جے گُج لوک اپنی جاناں نانہ خطرہ مانہ پا غے ایسی جگہاں
 تیں بالن غی لکڑی اکٹھی کرن غی کوشش کریں جھڑی اُن واسطے خطرناک ثابت ہو سکے۔

WEATHER

گزشتہ ادھی رات تیں بعد جموں گا بکھ بکھ علاقان مانہ لگاتار بارش ہو رہی ہے جس غی
 وجہ نال جگہ جگہ پانی جمع ہو جان تے ٹریفک رُکاوٹ غی وجہ نال روز مرہ گا
 مسافراں نانہ مشکلات پیش آرہی ہیں۔ واضع رہ جے محکمہ موسمیات غی طرفوں اج
 پاری بارشاں غی پیش گوئی کی گئی ہے جس غی وجہ نال کئی جگہاں ور بدل پٹھن
 اچانک سیلاب آجان زمینی تودا کھسکن کیچر گا رو تے پتھر وغیرہ آجان جیسی صورتحال
 پیدہ ہو سکے مقامی محکمہ موسمیات نے یوٹی غا کئی ضلعان مانہ اج پاری تیں مچ پاری
 بارشاں غی پیش گوئی کی ہے۔ اسے دوران خراب موسم غی وجہ نال تمام نجی تے
 سرکاری سکول لگاتار اج وی بند رکھیا گیا ہیں سکولی تعلیم غی جموں دائریکٹوریٹ غی

طرفوں جاری کیا گیا اس حکم نامہ غے مطابق البتہ جت ممکن ہو سکے گو آن لائن
کلاساں غو اہتمام کیو جائیگو۔

PTC

علاقائی خبراں آلا شعبہ آکاشوانی جموں غی طرفوں ضلع جموں واسطے عارضی نامہ
نگاراں یعنی پی ٹی سی واسطے درخواست منگی گئی ہیں۔مجوزہ پرفارمہ ور عارضی نامہ
نگار غی پوسٹ مانہہ دلچسپی رکھن آلا ایسا امیدوار درخواست دے سکیں گا جہڑا ضلع جموں
گا بسنیک ویں تے اُن غی عمر 24 براں تیں 50 براں غے بشکا ر وے۔ پی ٹی سی غی اس
پوسٹ واسطے تعلیمی قابلیت پی جی ڈپلومہ یا صحافت غا شعبہ مانہہ ڈگری یا فر تسلیم شدہ
یونیورسٹی تیں گرجویشن غے ہمراہ 2 براں غو صحافت مانہہ تجربو مقرر کیو گیو ہے۔ اس تیں
علاوہ کمپیوٹر تے ورڈ پروسیسنگ نالے خبر اکٹھی کرن آلا آلات تے میڈیا کوریج مانہہ تجربو
وی ضروری ہے۔ عارضی نامہ نگار غی پوسٹ مانہہ دلچسپی رکھن آلا امیدوار واسطے لازمی
ہے جے ضلع صدر دفتر جموں یا اس تیں 10 کلو میٹر غادائرہ غے اندر رہائش پزیر وے اس
سلسلہ مانہہ درخواست غی ہارڈ کاپی ضروری دستاویزات غے ہمراہ ہیڈ ریجنل نیوز یونٹ
آکاشوانی پنچترتھی جموں مانہہ بزات خود

آئیندہ 14 ستمبر 2025 توڑی دے سکیں۔ اس بارے مزید جانکاری ویب سائٹ
www.newsonair.gov.in-ور دستیاب ہے۔
